

ONE PITITE BLANKE TCHAPÈLE

One pitite blanke tchapèle
Come pièrdûwe véla dins l' tiène.
Tot-autoû saquants sapins èt dès vîs tchin.nes.
L'avoz vèyu dispû l' grande vôle di Dinant
Vos qui passe avaur-là ?

One pitite blanke tchapèle
Dispû dès-ans èt dès razans
Au crwèsemint dès pîssintes
Come po dîre au pormwinrneû
Ostant qu'au cia qu'èpronte li gritchèt en auto :

Purdoz one miète li tims di v's-asturdjî
Vos po quî tot dwèt aler au pus abîye.
Purdoz one miète li tims d' sondjî.
Vos-avoz bin on soçon mièrseû,
On-ôte dins l' pènin
Po quî priyî.

Parèt qu'èle ni sièt qu'on côp tos l's-ans
On bia dîmègne do mwès d'awous'
Mins èle n'èst nin pièrdûwe po tortos
Li p'tite blanke tchapèle.

Marîye vos l' pout dîre lès cias qu'î taudjenut
Po raconter leûs djôyes, leûs pwin.nes,
Leûs rûses ou leûs boneûrs
Avou one fleûr ou one pitite lumerote.

On p'tit momint véla
Tot rapaujant
Dins l' pitite blanke tchapèle
Su l' tiène di Blocqmont.

Bernard Van Vinckt